



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 7



Odisha FC-i Aniket
Jadhav alizükogo



PTI aser military lenirtem tsungda
tesendaktep mali: Imran Khan

VOL. XX NO. 98 (ADOK 98)

DIMAPUR

ROGONÜ (FRIDAY)

ANEJETI (JANUARY) 20, 2023

₹ 5.00

Nagaland nung BJP & NDPP menden lemsaogo

Shillong, January 19, 2023 (Agencies): North east state asem- Nagaland, Tripura aser Meghalaya nung assembly election agitsüba jakdang BJP-i Nagaland nung menden lemsateptsüba tatem küma lemtetogo.

"Onoki Nagaland nung NDPP den seat-sharing agreement renemogo. BJP-i menden 20 aser NDPP-i menden 40 nung tokteptsü lemtetogo" ta NEDA convenor aser Assam chief minister Himanta Biswa Sarma-i ashi.

"Meghalaya nung onoki menden melemsatsü mesüra teloktep kecha malitsü. Tripura nung TIPRA MOTHA ya NEDA nung dena mali aser BJP-i tanga regional party tem den teloktep lir" ta Sarma-i ashi.

Election Commission of India-i January 18, 2023 nü Tripura, Meghalaya aser Nagaland nung elections agitsü osang metetdakja liasü.

Tripura nung February 16 aser Meghalaya o Nagaland nung February 27, 2023 nü polling asütsü ta ECI-i ashi.

HSLC/HSSLC tatidang anogotem metetdaksüogo



Dimapur, January 19, 2023 (TYO): Nagaland Board of School Education (NBSE)-i Brihostibarnü Board Examinations indang osang metetdaksüogo.

March 10 nungi 22, 2023 tashi High School Leaving Certificate (HSLC) Examination 2023 agitsü aser March 9 nungi 31, 2023 tashi Higher Secondary School Leaving Certificate (HSSLC) Examination 2023 agitsü ta

NBSE-i metetdaksü.

HSSLC Examination tatidang den külemi Class XI Promotion Examination 2023 agitsü ta parnokisa ashi.

HSLC Examination 2023 atema kaketshir 24,360 aser HSSLC Examination 2023 atema kaketshir 16,083 lir. Ano Class XI Promotion Examination 2023 atema kaketshir 22,005 lir.

HSLC aser HSSLC tatidang anepdang 9:00 ako aser Class XI tatidang nikongdang 1:00 ako nungi tenzüksü ta NBSE-i metetdaksü.

HSSLC, HSSLC aser Class XI Promotion Examinations 2023 indang routine www.nbsenl.edu.in nung agüka lir aser kobi melii NBSE indang website nung Examination Centres aser Roll Numbers indang School-wise allocation metetdaksütsü.

Dimapur nung election duty shitak meinyakertem merenshitsü: DC & DEO

Dimapur, January 19, 2023 (TYO): Dimapur district nung sorkar mapa inyaker kari dang election duty nung tim mesüi inyakra showcase notice agütsütsü ta Dimapur Deputy Commissioner & DEO, Sachin Jaiswal IAS-i ashi.

January 19, 2023 nü Flying Squad team den jembidang pai iba osang metetdaksü.

Election agitsü osang metetdaksüba sülen Model Code of Conduct benokogo aser Dimapur district kübok flying squad mapa lezmüksüogo, ta DC Sachin-isa ashi.

Iba senden nung ADC & RO for Dimapur 1 and II, Mhalo Humtsoe-ia ketdangsürtem dang MCC guidelines reprangtsü aser jungjunga angatetsü metetdaksü.

Ano, Dimapur Commissioner of Police and District Magistrate Kevithuto Sophie, IPS-ia tanga sangdong ka nung Dimapur, Chumoukedima aser Niuland

District tem nung Arms Licence holders ajaki parnok anasatiba Police Station nung licensed Arms agütsütsü metetdaksüogo.

February 10, 2023 matongdang licensed Arms agütsütsüla aser iba tashi mangartem Arms Act, 1959 kübok temerenshi alitsü aser Arms Licence agientsü akok ta Kevithuto Sophie-isa ashi.

Paisa Dimapur, Chumoukedima aser Niuland District tem nung CrPC indang Section 144A ozüng agütsüba osang metetdaksüogo.

Iba ajanga district asem nung nisungtemi prangpong-injang/hadir (firearms, machete/daos, clubs, Spears, explosives, catapults or any other articles designed or adopted as weapon for offence or defense) kecha bener mesenzütsü tenokdangba agütsür, ta Dimapur Commissioner of Police aser District Magistrate-i ashi.

Nagaland nung general election agitsü renema lir: CEO

Kohima, January 19, 2023 (TYO): Nagaland nung election tiptema agitsü renema lir ta Chief Electoral Officer (CEO) V. Shashank Shekhar-i metetdaksüogo.

February 27, 2023 nü Nagaland Assembly general election agitsü aser iba atema January 31 nungi nominations maparen tenzüksü. February 10 tashi nung tenüng agütsüba maparen tembangtsü aser March 2 nü votes azüngtsü.

State Election Office-i Nagaland state general election agitsü atema renema lir, ta Shekhar-i ashi.

"Ni anir ozü telok, state officers, District Election officers aser Police ajak election atema kanga junga renema lir. Tesüiba hopta ishika onoki tensa meyipa reprangshia arur" ta pai ashi.

Electronic Voting Machines (EVMs) tendangba mapa mezüngbuba level temogo aser district shia nung EVMs strong room nung yua lir. Külen election atema mapa lezmüksürtem aiben training agiogo, ta CEO Shekhar-isa ashi.

Nagaland-i Central Armed Police Force (CAPF) indang company 305 meshi aser tang tashi nung advance companies 75 aruogo aser tanüngbatemji arutsü. Democracy tangatetba

nung elections tiptema agitsü imlar, ta paisa shisem.

Nagaland nung vote enoktsür 13,17,634 lir aser parnok rongnung service voters 7,983 dena lir. Arishi küm 80+ Senior Citizens 36,403 aser Persons with Disability 6,970 tashi lir, ta paisa metetdaksü.

Nagaland nung polling stations 2,315 lir aser iba ya 2018 dang nungi 5.51% agi teimba lir. Taoba assembly elections nung polling stations 2199 liasü.

Polling station 680 tashi 'vulnerable' aser 920 tashi 'critical' ta ajiteta lir, ta Nagaland CEO-i ashi.

Nagaland nung voters tajemtiba aliba Polling Station ji Wokha district kübok 40 Bhandari nung 71-Merapani Polling Station lir. Iba nung vote enoktsür ajak agi 37 lir. Külen nisung teimtiba alibaji Zunheboto district kübok 32 Atoizu constituency nung Polling Station 12-Usutomi lir. Iba nung vote enoktsür 1,348 lir.

Assembly Constituency rongnung voter teimba alibaji Ghaspani-1 A/C Chumoukedima district lir. Iba Constituency nung vote enoktsür 74,395 lir. Külen, voters tajemtiba aliba Assembly Constituency ji Mokokchung district kübok Mokokchung Town A/C lir. Iba Constituency nung vote

enoktsür 8,302 lir.

Niuland district kübok Nihokhu aser Kohima district kübok Khuzama yimtsüng anati vote yoka machitsü indang bangjemtepogo aser iba atema yimtsüng ana nem tenüngsang agütsür. Ano maneni yimtsüng talila tejakleni arutsü imlar, ta CEO Shashank Shekhar-i metetdaksü.

Nagaland Legislative Assembly nung menden 60 nungi ka tazüng lir aser ibaji January 7, 2023 nü MLA aser taoba speaker Dr Imtiwapang Aier asüba ajanga lir.

Tang NLA nung Nationalist Democratic Progressive Party (NDPP) MLA 41, BJP MLA 12, NPF MLA 4 aser Independent MLA 2 lir.

DGP Sharma-i MCC benokba metetdaksür:

Külen, Director General of Police (DGP) Nagaland, Rupin Sharma-i ECI tetuyuba ama Model Code of Conduct (MCC) benokogo.

Nagaland police den CAPF-i ozüng alema yi shibelenba, sen amshiba, mozü aser prangpong-injang belenbatem noktangtsü tenzükogo, ta Rupin Sharma-i ashi.

DGP-isa public dang security forces aser election ketdangsürtem den yaritepa elections tiptema agitsü mepishia metetdaksüogo.

Minister Kaito Aye-i kaketshirtem dang telungjem asoshi inyaksü ajungshi

Mokokchung, 19th JAN (TYO): Ao Kaketshir Mungdang 69 buba inti senden Jan 18 aonung nungi tenzüka Akhoya yimdam "Mapaküm Shisaluyim" omen nung ajemdaker mungdaki.

Tananü Jan 19 anepdang sentong nung Nagaland Chief Minister, Neiphu Rio tongü tesemdang jaoka liasü, saka pa yimden maparen kar ajanga Delhi-i aoba ajanga pa medentet, aji süaka, AKM puri moa pa melena Nagaland Agriculture & Cooperation Minister, G. Kaito Aye arua sentong meraketsü.

G. Kaito Aye-i iba sentong nung jembidang, kaketshirtemji asüng asoshi lenirtem lir ta asüba tangatetba nung mulungtet telok balala den yimsüsürtem aser nürburtem külemi lungjemer lokti tejakleni odaktsütsü asoshi merangba ngua AKM dang pelaba metetdaksü.

Naga nunger ya tangari lungjema lir ama bilemer, aji saka, chichiba nungbo asen lokti ya telemsa agi sünga lir, anungji, Ao kaketshiri anir Naga nunger kaketshir ajungaiia telungjem asoshi inyaksüla, kechiyong telungjemji asenok asoshi tashi lir, ta pai ashi.

Ao kinji lenla aika nung samanir lir, aji oda, Naga nunger ya tang temangmangtsü lenjem ka nung noktaka lir, anungji, Ao

kini samanir mapaji maneni inyaksüla aser Naga nungeri nenok dak nungi aji imlar, ta paisa shisem.

"Lokti menentsür ka masü saka lokti asoshi tajangzük agütsür kaketshir kaka akümtsü merangang", ta paisa kaketshirtem ayongzüka liasü. Paisa AKM 69 buba inti mungdang nung adokba nungo kaketshir ka sayatsü aser paisa Akhoya yimdam aliba Dr. E.W. Clark sarasademba tesem semdanga liasü.

Er. Moa Aier, Engineer-in-Chief Department of Power aser Er. Atoba, Engineer & Technology Entrepreneur Founder, Tabernacle – the Go-to-Software for Churches tenati "Mapaküm Shisaluyim" omen nung ajemdaker tagitsü shisatsü tajung aika bener arua mungdang sanger ayongzük.

Tanü sentong balala nung Nagaland Legislative Assembly Speaker – Sharingain Longkumer, NSF tir - Kegwayhun Tep, ENSF tir - Chingmai Chang, Ao Senden tir - Chubawati Longchar, Tuensang DC – Nokchashashi, Watsü Mungdang tir – S. Arenla Logkumer parnokia tayongzükba o den salem o tulu bener arua mungdangsanger ayongzüka liasü. RD Minister,

Metsübo Jamir tanü sentong ka nung shilem agitsüba liasü saka koda masüba maparen kar ajanga medentet.

Kaketshir asem nem AKM educational promotional trust award agütsü; Year of Commerce 2020 – Samenba Longkumer (Longsa), Tetso College, Year of Arts 2021 – Imkongkumla Ozüküm (Mongsenyimti), Unity College, Year of Science 2022 – Imkongwapang (Lakhuni), Immanuel College parnokia agizüka liasü.

Tanü Akhoya yimdam 'Tsüngrem Sabang Lijaba Anendak' ta sür nungshi (monument) ka lapokogo. Lijaba tsüngrem Akhoya nung aruagi Nungjasangla aser tenu Alala na kidang anenzüka yipzük, ta pai tena lu moatsü. Lijaba ya Akhoya kümer putu tanabuba Reongsanger mapang aru ta jembir. Ibai par yimer asoshi otsüsütsü aketba nungshi ka lir.

Tanep Akhoya yimdam Akho organic 'banana chips' (premium) ka sayaogo. Iba ya Akhoya organic farmers producer company Ltd-i yanglur. AOFPC ya MOVCDNER sentong kübok 24 Feb. 2022 nü tentetba organic food producer company ka lir. Iba chips ya tejang ka nung senpak 120/- lir.

Chumoukedima jila nung flag march ayongzüka agi



Chumoukedima nung Police aser central force personnel temi Flag march sentong ayongzüka agiba noksa nung angur.

Dimapur, Aenjeti/January 19 (TYO): January 19 nü Chumoukedima ACP, Ninoto I Zhimomi lenisüba nung Chumoukedima jila nung police personnel temi flag march sentong ka ayongzüka agiogo.

Police aser central force temi ayongzüka agiba flag

march nukjidongji, taruba State Assembly Elections dak sendakba nung yimjung aser tesunep ajungkettsü aser law & order machinery tem dak nürburtem tali temulung lemteta kümdaktsütsü aser police aser nürburtem tsüingda tesendaktep yanglushitsü atema liasü.

Flag march ya Agri Expo Gate nung tenzüik aser Chumoukedima Town CT Square nung tembanga liasü. ACP, Ninoto. I Zhimomi lenisüba nung police, CRPF, IRB aser Special Task Force Personnel temi iba flag march sentong nung shilem agia liasü.

PM Modi-i kaketshir tesayur aser tsürapurtem den sensak asemtsü

Dimapur, Aenjeti/January 19 (TYO): Directorate of School Education-i sangdong ka ajanga, Ato Kilonser-i January 27 nü Talkatora Stadium, New Delhi nung 6buba Pariksha Pe Charcha 2023 sentong agiba mapang kaketshir, tesayur aser tsürapurtem den sensak asemtsü ta metetdaksüogo. Iba sentong nung kaketshir 1200 shi-i shilem agitsü.

Ato Kilonser sensaksem sentong ya DD National, DD News, DD India ajanga Doordarshan nung live sayutsü. Iba sentong ya radio channel tem (All India Radio Medium Wave, All India Radio FM Channel) nunga live yoktsü aser PMO, MoE, Door Darshan, MyGov.in aser MoE YouTube

channel, Facebook Live aser MoE Swayamprabha channel tem nung live web stream asütsü.

Iba dak sendakba nung Nagaland kübok school tekolaktem (Government & Private) dang class 6 nungi temapurtem ajak live telecast sentong nung shilem agidaktsütsü atema a c h a y a n g t s ü t s ü metetdaksüogo.

School tem nung TV aser electricity connection melira computers/Laptops/Mobiles amala tanga lenmang kar bushia iba anogo Ato Kilonser-i o jembiba reprangdaktsütsü/angadaktsütsü asoshi metetdaksüogo. Kinük nung aliba tesemtem kong TV

anepalutsütsü asoshi kecha lenmang mali, item tesemtem nung radio/transistors anepaluja tanurtem nem Ato Kilonser sensaksem angadaktsütsü.

Sentong tembangba sülen school ajaki iba sentong nung kaketshir aser tesayur kwi kati shilem agi, iba indang osang agütsütsüla aser iba den tanurtem sentong nung shilem agiba noksa anana DoSE Nagaland Online School Monitoring Portal <https://school.dosenl.in> nung kasa anogo; 27/01/2023 nikongtsütsü 3:00 ako matong tsüingda inoktsütsü asoshi tetuyuba agütsüogo.

Iba sentong sayatsüba mapang tatsüka lir metetdaksütsü.

Kohima District Planning and Development Board senden menogo

Dimapur, Aenjeti/January 19 (TYO): 2023 küm atema Kohima District Planning and Development Board sendem mezüngbuba January 19 nü DPDB Conference Hall Kohima nung menogo. Iba senden ya DPDB Chairman & MLA Keneizhakho Nakhro lenisüba nung mena liasü.

Senden nung mendenbubai taküm küm atema mezüngbuba senden-i züngsemtem ajak pelashishia agizük aser züngsemtem den tanaben ajurutepba atema pelaba lemsatop.

Senden nung DC aser Vice Chairman DPDB Kohima Shanavas C IAS-i, election agitsü ana nung lir aser Election guidelines kübok Polling Stations tem koba timba school kitem lir,

item ajak nung Assured Minimum Facilities (AMF) alitsüla ta shia pai, PHED, Power, Social Welfare, Education amala line department aser ken o dak sendaka aliba department tem dang running water, tajemtsützü, power connection, PwD voter tem atema ramp aser school toilet amala facility tem takaratiba nung amenoktsütsü asoshi metetdaksüogo.

Senden nungsa taoba senden indang minute tem lepa reprangshi aser society tem züngoksemtsüba indang onük benoka sensak asem. House-i tenüingdakba criteria aser data tem asadanga sülen Angami Public Organization; Sangtam Baptist Church Kohima Welfare Society; Baptist College Alumni

Association, Mission Compound Kohima, aser Go-Taxi Service, Kezuozou, Kohima amala society tem züngoksemtsü atema jenjang tapet agitsü asoshi sorkar dangi abentsü telemtetba agia liasü. Viswema Disabled Parents' Association dak sendakba nung house-i, iba ken o ya Social Welfare department ajanga inyaksangshitsü telemtetba agia liasü.

Senden nungsa Kohima district kübok tesem balala nung benoka inyaksangshiba Jal Jeevan Mission indang PHED Department-i Power Point presentation ka agüja liasü. Maneni taruba senden nung Sericulture Department-i parnok inyakyim indang metetdaksütsü asoshi nonglokttsüogo.

Netaji tasoba anogo nung wako 126 salaogo

Dimapur, Aenjeti/January 19 (TYO): January 18, 2023 nü Netaji Subhash Chandra Bose asoba anogo nungtem nung Nagaland Civil Secretariat, Kohima nung linük wako 126 salaogo.

Tanep Nagaland Chief Secretary J. Alam, IAS-i wakotem salatsü.

Netaji Subhash Chandra Bose ya linük nung nüjiso atema rarartem rongnung nisung ajaki meimba nisung ka liasü. Pai nüjiso atema maparen nung shilem agibaji masadantet aser pa taküm aser mapa ajanga sensotem maneni ajungmesor, ta Chief Secretary Alam-i ashi.

Iba sentong nung densemba ya maongka ka lir, ta paisa ashi.

Iba sentong nung Nagaland Police Training School Brass Band, Nagaland Police Auxiliary Brass Band, 15th NAP (Mahila) Battalion Pipe Band aser 1st Assam Rifles Pipe Band ajanga Brass and Pipe Band display süa liasü.

DC & DEO Kohima-i IG Stadium mekazükogo

Dimapur, Aenjeti/January 19 (TYO): Representation of People Act 1951 Section 160 kübok tashi agüja aliba dak ajemdaker Deputy Commissioner aser District Election Officer Kohima, Shanavas C IAS-i, 14buba Nagaland Legislative Assembly Election 2023 atema shimba garitem

anendena ayutsü atema IG Stadium Kohima ya February 10 nungi election inyakyim metembang tashi mekazükba metetdaksüogo.

Atakzükja aliba mapang tsüingda iba tesem nung tanga inyakyim kecha benoka inyaksangshitsü asoshi memelatsü ta kasa sangdong ajanga metetdaksüogo.

Netaji takümdak ajemdaker Drawing aser Painting tetoktepba ka agi



Capital Cultural Hall, Kohima nung January 18 nü Netaji Subhas Chandra Bose taküm dak ajemdaker agiba Drawing & Painting tetoktepba nung kaketshirtemi shilem agiba noksa nung angur.

Dimapur, Aenjeti/January 19 (TYO): Netaji Subhas Chandra Bose sor küm 126 ajungba anogomung nüngdem nung Netaji Subhas Chandra Bose taküm dak ajemdaker Capital Cultural Hall, Kohima nung January 18 nü Drawing aser Painting tetoktepba ka ayongzüka agiogo.

Iba tetoktepba nung Kohima kübok school 26 nungi kaketshir 126-i shilem agi, koba Nagaland Board of School Education-i ayongzüka agia liasü.

Kaketshirtem ya Rüzühkhrie GHSS, Dr. Neilhouzhü Kire GHSS, TM GHSS, GHS PWD, GHS Chandmari, GHS New Market, Mezür Higher Secondary School, Don Bosco Higher Secondary School, Minister's Hill Baptist Higher Secondary School, Chandmari Higher Secondary School, Little Flower Higher Secondary School, Model Higher Secondary School, Stella

Higher Secondary School, Holy Family Higher Secondary School, Mt. Sinai Higher Secondary School, St. Mary's Cathedral Higher Secondary School, Dainty Buds, Fernwood School, Modern Academy Higher Secondary School, Corragio School, St. John School Merhülietsa, Trinity School New Reserve, St. Peter's School, Rev. Dr. Neiliezhü Üsou Memorial School, Assam Rifles Public School, aser Vineyard School nungi liasü.

Iba tetoktepba nung Department of Art & Culture nungi Artists asem tetendanger liasü aser parnoki drawing aser painting tajungtiba 20 shima liasü. Tetoktepba tembangba sülen drawing tem ya nikongtsütsü sobaliba sentong agiba mapang Capital Cultural Hall nung nürburtem nem reprangdaktsütsü atema tokja liasü.



HQ IGAR (North) tawabangba kübok Aasam Rifles Tuensang Battalion-i ayongzüka Mon district kübok Wangton yimtsüing nung January 19 nü medical camp ka ayongzüka agiba mapang tangokba noksa nung angur.



New Delhi, January 19, 2023: Brihostibarnü New Delhi nung NDRF Raising Day anogomong nung NDRF indang uniform tasen sayaba sentong nung Union Minister for Home Affairs, Nityanand Rai aser National Disaster Response Force (NDRF) DG, Atul Karwal na adenba noksa nung angur.

India-i BBC indang documentary 'The Modi Question' aitsür

New Delhi, January 19 (Agencies): Brihostibarnü India-i 2002 küm Gujarat nung rara tulu adokba indang BBC documentary ya tenüng menüktsütsü atema lir, ta aitsüogo.

Iba documentary dak sendakba nung osangbenertemi asüngdangba langzüdang External Affairs Ministry otongdar, Arindam Bagchi-i, iba documentary ya tenüng menüktsütsü atema lir, nükjidadong mali aser iba documentary ajanga maneni akhidang melungsentsü keta aliba jangjajangja ajiteter, ta metetdaksü.

"Iba documentary ya kechi nükjidadong nung adok aser kechi tebilemba nung adok, ta onoki shisadangtsüsa akümer," ta pai

ashi. BBC indang shilem ana aliba series "India: The Modi Question" ya Mongolbarnü saya aser iba mapang nungjagi tenzüka video clips aika prokshio. Documentary nungji Narendra Modi yimtenren nung ajemoka jenjang tajungba akümba, 2002 küm Gujarat nung rara tulu adokba mapang Muslim nungger aika tepsetba atema Modi nem tai tongloksüba indang lir.

Documentary series saraa ashir jagi yamai ashir, "India Ato kilonser Narendra Modi aser India nungger Muslim tsüngda koda masüba tensa, 2002 küm rara nung nisung meyrjang ka dak tema asüba nung pa shilem indang bushisüngdangba."

Yimtenren nung tanemertem

aikati twitter ajanga nüburtem dang iba documentary reprangang ta ajungshia liasü. Ajisüaka tangbo India nung iba documentary ji YouTube nungi agienadokogo, anungji India nungbo mereprangtetsü.

Yaküm June ita nung Supreme Court nung judge aseme akümba bench kati Special Investigation Team's (SIT)-i 2002 küm Gujarat nung rara tulu adokba ken o nung taoba mapang Gujarat chief minister, Narendra Modi den nisung 63 maitsüba pusema obendang agütsü aser Congress lenir asür, Ehsan Jafri kinüngtsü, Zakia Jafri-i agütsüba temepishiba ken o magizük.

Supreme Court-ia 2002 küm rara adokba ken o nung Ato kilonser Modi maitsü.

India nungger aikati US aser Russia ya tembar linük ama bilemer

New Delhi, January 19 (Agencies): India nungger teimbakati India atema tembar tajungtiba linük anaji US aser Russia na aser tamajungtibaji China ama bilemer, ta survey ka ajanga bushitet.

Morning Consult-i agiba survey report ajanga ashiba agi, India nungger tain teimbakati Russia aser US na ya tembar tajung linük ama bilemer aser China o Pakistan na ya tanemer linük ama bilemer, ta metetdaksü.

Ajisüaka India nungger tain teimbakati (shilem 38) Ukraine

nung rara atema Russia aitsür, shilem 26-i Ukraine nung rara atema US aitsür aser shilem 18-i Nato aitsür.

Kasa survey ajanga, India nungger tain shilem 43-i India atema sepa tsütsülen nungi amokmeren tulutibaji China lir ta bilemer, ta metetdaksü.

"Temaba jenjang nung ken o jembiyonga aser G20 sendentem nung linük ana (China-India) nungi lenirtem ajurua jembiyonga linük ana tsüngda sepaitem raratsüsa lir," ta Morning Consult-i agiba survey report ajangasa

metetdaksü.

India nungger aikati US ya tembar linük ama bilemyonga India nungger shilem 22-ibo India atema amokmeren aliba linük tanabubaji US lir amai bilemer.

"Washington (US) aser Beijing (China) tsüngda tesendaktep tamajungba akümba mapang US-China tsüngda rara adoka region nung security tensa raksara India tiyongtsü nung mejeptsüa akok ta India nunggeri shisabulua bilemer," ta Morning Consult-isa metetdaksü.



January 19, 2023 nü Kerala yimtiba, Thiruvananthapuram nung aliba Kovalam tzüküm nung Union Minister of State for Health & Family Welfare, Bharati Pravin Pawar aser G20 linüktem nungi delegates kar yoga exercice agiba noksa nung angur.

TARGET NPSC 2023

PRELIMS

PREPARATION

MAINS

PREPARATION

INTERVIEW

PREPARATION

WITH

NSSB

TOP EDUCATORS | CONCISE MATERIALS

RS. 45,000/- ONLY

JOIN TODAY

TARGET UPSC 2024

GS FOUNDATION
OPTIONAL PSIR | HISTORY

YES, YOU CAN BECOME THE NEXT

IAS

NCS

WE DELIVER QUALITY TEACHING & CONTENT

GIRLS PG IN CAMPUS
BOYS PG IN CAMPUS

CALL NOW @7005114715

ADMISSION OPEN

NPSC PREPARATION 2.0

PM Modi-i Mumbai nung sen cr. 38,000 indang projects tenzüksü

New Delhi, Aenjeti/January 19 (Agencies): Brihostibarnü Ato kilonser, Narendra Modi-i Mumbai semdangba mapang nung pai sen crore 38,000 indang project aika atema foundation lung azüngtsüba den külemi project kar semzüksüsiogo.

Iba sentong nungji jembidang Modi-i, India nungger nüchiso anguba sülen tang mezüng India-i mangdang tulu yur inyakba atangji ataloker, ta ashi.

Alima linüktemi India tejakleni odar ta meteta lir, ta pai ashi.

Ato kilonser Modi-isa sen crore 12,600 indang Mumbai metro rail Lines 2A & 7 semzüksüba sülen Metro train nungji amen.

Tanü tenzüksüba projects aser semzüksüba projects ajanga Mumbai nung nüburtem libaliro tajungba akümsü; yimti aser temeket nung temelenshi adoktsü, ta pai ashi.

Tang alima nung rongsenketzung tulu aliba linüktem timtemba mapang ka nung India-ibo nisung crore 80 nem maneni angati rations agütsüteter, ta pai ashi.

Alima nung rongsenketzung jenjang ajema akümba mapang India-i terenlok mapatem maneni inyaker, aser ibaji ajanga linüki terenlok lenmang nung jajaba jangjar, ta pai ashi.

Mumbai nung terenlok tera ajema aküm, ajisüaka Chief Minister, Eknath Shinde aser Deputy CM Devendra Fadnavis

nati sorkar tashi anguba sülen terenlok kanga kera akar, ta pai ashi.

"Mapang ka nungbo sensakertem atema welfare senotsü tim mesüi amshia liasü. Mapang ka nungbo asenoki sensak tia atema dang jembi aser tanga linüktem dang nungi senotsü teyari meshia liasü, saka tangbo yamaji masü," ta pai metetdaksü.

MMRDA grounds, Bandra Kurla Complex (BKC) nung ayongzükbaba sentong nung Modi-i sewage treatment plants tenet atema foundation lung azüngtsü, gari lenmang concretization project ka aser Chhatrapati Shivaji Maharaj Terminus terenlok atema lung azüngja liasü.

Modi-isa MUMBAI 1 Mobile App & National Common Mobility Card (Mumbai 1) semzüksüsiogo. Iba app ya Metro stations telungi aiba mapang nung sayutsü aser UPI ajanga ticket alizüktsü atema sen agütsütetsü.

Modi-i tenzüksüba Sewage treatment plant 7 ji sen crore 17,200 indoka yanglutsü. Item plants ji Malad, Bhandup, Versova, Ghatkopar, Bandra, Dharavi aser Worli nung amenoktsü.

Modi-isa Hindufridaysamrat Balasaheb Thackeray Aapla Dawakhana' clinics 20 tenzüksüsiogo aser item clinic nung nüburtemi angati health check-up agitettsü aser mozü angati angutsü.



TIR YIMYIM YIMOBILEM (EDITORIAL)

DIMAPUR ROGONÜ, AENJETI(JANUARY) 20, 2022

BJP Maneni Merener

- *Tangsen Lemtur*

2014 küm Lok Sabha election nung BJP-i takok tulu ngua Centre nung sorkar akümba sülen Ato kilonser, Narendra Modi aser taoba BJP Tir, Amit Shah na leniba nung state assembly elections aika nung BJP-i takok ngua aruogo aser tang Modi den BJP Tir, JP Nadda na leniba nunga state assembly elections aika nung takok ngua arudar. Ano state kar nungbo BJP-i menden peria mengutetyonga parnoki tanga party den lokteper sorkar kümogo aser state kar nungbo tanga party MLA temi pei party toktsür BJP nung züklokba ajanga menden abensar sorkar kümogo. Yamaji taküm India Union kübok state 9 nung assembly elections ajak nung BJP-i takok angutsü nükjidong yur inyaker. Taruba ita Tripura, Meghalaya aser Nagaland nung assembly election agitsü aser takümsa Mizoram, Chhattisgarh, Karnataka, Madhya Pradesh, Rajasthan aser Telangana state tem nunga assembly elections agitsü. Item elections ajanga sangküm Lok Sabha election nung shilem tuluka agitsü. Alima nung mapang shia yimten yimsüsüba menden melenshir. Congress-i mapang talangka India yimsüsüa aruogo aser tangbo BJP merener. Yamaji Nagaland nunga mapang ka nungbo Congress Party kanga merena liasü, NPF-a merenogo aser tang NDPP merener. India nung yimtenren party tulutiba ana- Congress aser BJP na melentepa merener, aser tang ya BJP maneni merenba mapang saka Congress bo sentsü kanga ajema kümogo. British nung yimsüsüba kübok India nung küm aika lir nüchiso anguba sülen Congress-i küm aika linük yimsü süa aru, aser tang BJP-i aniba sorkari yimsü tesüdak lir. Yimtenren nung takutet lenirtemibo par telok tashi itdaktsüba dang masü saka yimtenren nung tanemer party jenjanga raksatsüyonga aor. Aji oda BJP-i state aika nung Congress sorkar loksatsüogo aser region tasen nung party tasen amenoktsü meranger. Yamaji tesüiba küm ishika tsüngda northeast region nung BJP tera junga yangogo. Taruba ita Northeast nung aliba state asem- Tripura, Meghalaya aser Nagaland nung Assembly election agiba ajanga Northeast yimtenren nung temelenshi alitsü. India nung tanga state tem den medemdangra state asemprong ya state tilatem dang lir, ajisüaka item state nung yimtenren latetba ajanga sangküm Lok Sabha election nunga terabosa kongshitsü. Nagaland nung 2018 küm election nung menden lemsaba ama BJP-i taküm-a NDPP den menden lemsar tokteptsü tebilemba lir aser Meghalaya nunga BJP-NPP teloktep sorkar lir, ajisüaka takümbo NPP-i parnok kijai tokteptsü ta sangdongogo. Tang northeast state tenet nungi state pezü nungbo BJP chief minister tem lir; Northeast nung aliba state tenet nung Lok Sabha menden ajak senteper 24 lir aser iba nungjagi Lok Sabha menden 17 bo NDA nung lir. Tripura, Meghalaya aser Nagaland state tem nung mapang talangka Congress sorkar liasü saka tangbo state asemprongla nung jenjang mejungi lir. Taoba assembly election nungbo Congress-i Nagaland aser Tripura naprongla nung menden ka danga menguteti liasü. 2014 Lok Sabha election nung nüburtemi Ato kilonser candidate, Narendra Modi dak tamang kaa pai aniba party nem takok tulu ngudaktsü, aji oda India nungertemi maneni parnok dak tamang kaa kümsük anabuba linük yimsüsüa arudar. Taküm state 9 nung assembly elections nung BJP-i junga takok ngura Lok Sabha election atema shisabulu malitsü; tamakok ngura party tashimaitba meyipa reprangshitsüsa akümstsü.

OLEMSABANG

YI TONGPANG NUNGI MOZÜLAR WADANG

~ P.Renthy Jamir

Alima kin aikati yi ajemba nokdanga yi samatsütsü meranger. India nunga state aika nung yi nokdangtsü asalendong balala yangludanger saka makoker aser makoktsü, kechiyong iba ya alima Tzü agi mesamatsüdang Noa nung mapang nungi jema aruba chiyungtsü lir. Anungji zubazuba-atamang agi makoktsü kecha maka ta jembitsü menungtak. Tashi temetet America Lima nung yi anema Prohibition Bill 1919 January nung passed sür 16th January 1920 nungi enforced asüsaka tayoker tajemer teimba kuma nübur tali majung aküm, koba dang ashih auer putu (Gangster Era) ta aja. Anungji iba Act 1933 nung agien. India nung Khristan state Mizoram nung yi mayoktsü ozung 1997 nungi tenzüka benshi saka tali tamajungba kuma lanurtem miim MOZÜLAR jenti takum sama. Anungji yibo menokdangtet, mozü chiketer tali aküm nung Kum 17 yudanger, 10-08-2014 nung agienogo. Nagaland nunga 1989 nungi tanü Tashi iba Prohibition yua lir. Tamalenbo yi chipo Tashi indokja inyadngogogo saka takok mangur oda Nagalandjibo yutsur, mejeta Ao Lima nungi yi meshimeshia samatsütsü DECLARATION 18-11-2011 nung ABAM lemtet N0-115 ajangajanga lemteta ayu. Saka Küm paika süia aodang kecha temelenshiba asen Ao Lima nung mangur. Joko yi tongpangnungbo takoktsü lenmang sadema mangur.

Anungji Yi Tongpang ya khen tokja lir (Aji agi yi ayoktsü ajemtsu ta masü) Mozular miim mozü agi chiketer alir, Drugs addicts tebilemstu ya Nagalimajibo toktsür Ao lima atema ABAM-i shilem agia mapa tajung ka inyak nungbo Koda ta shisa lemsateper. Kechiyong alima rangben nung yi tebilemstu dang nungi noklangben agi mozü chiketer aser mozü shibelenba ya tebilemstu khuret tuluba kuma lir. Tang alima nung drugs addicts, mozü chiketer nisung million 17 tema lir ta ashir. Asen kidanger Manipur nung Kum ana nung lanur 45,000 drugs addicts renlok ta ashir. Naga Lima nung 1976 Revival sulen lanurtem iba mozü achiba tenzük. Ao lima nunga aier asangur Mokokchung pharmacy nung mozü chir Kong aliar memetet tsungangtepba otsü asenoki angashiogo. Yamaji tanem tanemi tanubo iba Tia yagi aitogo. Iba ya meimchir atema tebilemstu khuret onsara Tulu asünung UN Special Session ka 09-06-1998 nung kin 150 World Free Drugs Conference ta sür Drugs Free World 2008 Tashi nungbo drugs achiba nungi alima rangben meshitettsü ta sür liasü. India nunga ozung tesashi Powerful Act Narcotics and Psychotropic Substance Act 1985 shibai drugs yokdir senchi sen lakh ka, Kum 10 jail, tanaben pura tasüba pl ok merenshitsu. Pakistan aser Arab limatem nungbo tepseta intoker, Philippines nunga aika tepseta intokogo. China Lima nung masü tashi jail. Yamaji drugs ayoker merenshiaka azuoktsü makoker.

Tanü India aser Nagalimai iba drugs ya Kong koba linuktem nungi bener arur ta süra, Heroin ya Burma, Thailand aser Afghanistan, Pakistan limatem nungi shibelener. Ano Ganja ya Nepal aser Bhutan Lima nungi Indiai bener arur. Nagalima asoshi opium ya tonnes aika kachin aser Imphal nungi Kohima aser Noklak Leni abener. Kechiaser asen kidangsür Senapati aser Ukhrul district (Nagaland border) nung Ganja cultivation 30,000 hectares yima lir ta ashir. Ano tawa UN report ajanga ashiba agi opium production in Afghanistan increased 32% after Taliban take over government. Taliban government arur kani noklang nung 32 percent agi tali tsünütetogo ta ashir. India nung Mozular tali zuinba agi pi bendang lima aika nung India nung azu (blood) memeruk memeshi ta Sweden lima nungbo blood bank nunga magir, Indian blood unacceptable in Sweden (Stockholm blood bank) we do not need your blood. Onok nenok zu menungtak ta ashishir.

Alima tesem aisulen terrorist telungpurtemi iba drugs shibelena ayoker aser lanurtem takum jenti iba lar akümer. NE India nunga Kachin Lima nung arogotem dena opium nung metaloker alir. Aser telungpurtemi yang nungi shibelener. Tawa NSCN kango teloki Isak Sumi apuba nung Global window osang bener den jembiba Isak Sumi yagi Ghonda 24 drugs (sunflower) achir ta aitsuba asenoki nguogo. Iba drugs shishilembar tetsüdi aika alima tesem balala nung lir aser governmenti itemji aputsü sen rongsen aser takum jenti lalua inyakteper. America lima iba tebilemstu ulura, kechiyong lanur jenti takum aser rongsen jenti lalua ya nokdangtsü meranger. America nungeri tayimtsü drone dena amshia Mexico nung Powerful drugs lord El Chapo Guzman arushi küm 56 tain 24-02-2014 nung pa bodyguard den tetsür ka densema apu. Iba nisung yagi U.S, Asia aser Europe Lima ajaklen drug shibelena ayoker. Tamalena pa pua küm 20 atema jaili yok. Saka Küm 8 lir laundry basket ajanga jena Ao. Anungji shibai paputsüdir sen US dollar million 5 agutsutsu nangzüka liasü. Kechiyong par telok den raradang (Gangs) nisung takum 77,000 samaogo ta ashir. Yamaji NE India nunga yamala tetsüdi drugs king Baba Khan 28-04-1994 Calcutta nung apu aser pai par kibong Tia indang yamai ashi. Jabaso tambusang drugs addicts, tanabuba Jabaso pasasa alenseta asü, tanabuba alcoholic yilar, pai Kanga sasaseta yamai ashi "I know God has punished my family but if I stop the business my dead son will not return." Ni metet Tsüngremi ozü kibong merenshir, saka ni kü shishilembabaji Tang anenyonga ku Jabaso tasüba Shia arutsü masu.

(Maneni asung adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



January 15, 2023 nü Jharkhand state yimtiba, Ranchi nung Khristantemi, Chhattisgarh nung Tenla kitem raksatsüba aser Khristantem amakba anema longkak aitba noksa nung angur. Iba sentong ya Jharkhand Christian Youth Association (JCYA)-i ayongzük. Parnoki GEL Church compound nungi Morabadi ground tashi jaja longkak ait.

Khristantem tamajungba reshikangshiba linükji N Korea lir: Open Doors US

January 19, 2023: Alima nung Khristantem tamajungtiba reshikangshiba linükji maneni North Korea sa lir, ta Open Doors US indang World Watch List report ajanga metetdaksü. Mongolbarnü (January 17, 2023) Open Doors US-i 2023 World Watch List report sangdongogo.

1993 küm nungi tenzüka Open Doors-i küm shia alima nung Khristantem tamajungtiba reshikangshiba linüktem sangdonger. Yaküm iba list nung Khristantem tamajungtiba reshikangshiba linükji Afghanistan liasü.

2023 küm World Watch List mezüngbuba jenjang nung North Korea lir, iba sülen temaba linük 10 rongnung densema aliba linüktemji Somalia, Yemen, Eritrea, Libya, Nigeria, Pakistan, Iran, Afghanistan aser Sudan linüktem lir.

Osangbener den jembidang Open Doors US Interim CEO, Lisa Pearce-i 2020 küm North Korea nung "anti-reactionary thought" ozüing benoka liasü aser iba ozüing kübok Laishiba densema antiölen aliba linüktem indang kaketterem bena alirtem anema ken o akar aser temerenshi agütsür, ta metetdaksü.

Iba report nungsa North Korea nungi jena arur, Timothy Cho-i lemsatepba osang kar lemsatep.

Cho-i, "Yimsüsüba (North Korea) anema nokdaker samanirji Khristantem lir. Parnoki linük nung Khristan ajak meshimeshia samatsütsü nükjidong nung inyaker. North Korea nung tsüngrem ka dang alitsüla, aser ibaji Kim kibong lir," ta ashi.

Yaküm World Watch List mezüngbuba jenjang nung Afghanistan liasüba tangbo jenjang 9buba nung ang lir. Yaküm US sepaitem Afghanistan nungi aienshiba sülen Taliban sorkar kübok Khristantem kanga reshikangshir.

World Watch List

tenzüksang, Wybo Niccolai-i, "Iba linük (Afghanistan) jenjang mezüngbuba nung aliba 9buba ang kümogo, ajisüaka tesüiba küm ka tsüngda iba linük nung tensa memelenshi," ta metetdaksü.

"Taliban sorkar amenokba mapang nung parnoki Khristan aika tepseta liasü aser Khristan aika jenshiogo. Khristan aikati Afghanistan toktsür maotsü telemtetba agi saka parnok miimshia dang alir," ta paisa metetdaksü.

Ano Nigeria linük-a Khristantem kanga reshikangshiba linüktem rongnung densema lir. Yaküm Nigeria nung Khristan 5,623 tepsetogo.

Lisa Pearce-i U.S. State Department dang Nigeria ya ano maneni country of particular concern (CPC) linüktem rongnung züngokang, ta mepishiogo.

Tang agi küm anabuba CPC linüktem rongnung Nigeria maliba ya agizüktettsü makok, ta lai ashi.

World Watch List nungsa alima nung Khristantem tamajungtiba reshikangshiba temaba linük 10 rongnung Sub-Saharan Africa nungi linük pezü densema lir. "Sub-Saharan Africa region ajak lendongi idar," ta World Watch Research Managing Director, Frans Veerman-i metetdaksü.

"Islamic State aser parnok den affiliate süa aliba telok balalai region tesem ajunga tashi meitdaksüba sülen Islamic yimli amenoktsü nükjidong nung inyaker. Mapang talangka agiyonga iba nükjidongji ataloktsü, ta parnoki amanger," ta paisa shisem.

Open Doors US-i ashiba agi, tang alima tesem balala nung Khristan million 360 dak tema reshikanghi kübok lir, aser ibaji alima nung Khristan tenet shia nungi katibosa reshikangshi ajangshiba den kasa lir.

Yaküm küm tashi Open Doors USA-i World Watch Lists sangdonga liasü saka

taküm Open Doors USA-i Open Doors International den pilar Global Christian Relief tentet. Ibayongji tang mezüng Open Doors USA masü saka Open Doors US-i iba List sangdonger.

2023 World Watch List nung Khristantem reshikangshiba linük tamajungtiba 50 ji- 1. North Korea (Score:97.77), 2. Somalia (Score:91.62) 3. Yemen (Score:89.26), 4. Eritrea (Score:88.78), 5. Libya (Score:88.46), 6. Nigeria (Score 87.93), 7. Pakistan (Score 86.42), 8. Iran (Score 85.91), 9. Afghanistan (Score:83.81), 10. Sudan (Score:82.99), 11. India (Score:82.13), 12. Syria (Score:80.49), 13. Saudi Arabia (Score:80.28), 14. Myanmar (Score:80.21), 15. Maldives (Score:77.08), 16. China (Score:76.81), 17. Mali (Score:76.30), 18. Iraq (Score:75.99), 19. Algeria (Score:73.18), 20. Mauritania (Score:71.54), 21. Uzbekistan (Score:71.29), 22. Colombia (Score:70.92), 23. Burkina Faso (Score:70.61), 24. Central African Republic (Score:70.16), 25. Vietnam (Score:70.08), 26. Turkmenistan (Score:69.74), 27. Cuba (Score:69.66), 28. Niger (Score 69.54), 29. Morocco (Score 69.37), 30. Bangladesh (Score 68.85), 31. Lao People's Democratic Republic (Score 68.29), 32. Mozambique (Score 68.12), 33. Indonesia (Score 67.95), 34. Qatar (Score 67.88), 35. Egypt (Score 67.79), 36. Tunisia (Score 67.14), 37. Congo (Score 66.67), 38. Mexico (Score 66.50), 39. Ethiopia (Score 66.48), 40. Bhutan (Score 66.31), 41. Turkey (Score 66.26), 42. Comoros (Score 65.98), 43. Malaysia (Score 65.74), 44. Tajikistan (Score 65.51), 45. Cameroon (Score 65.18), 46. Brunei Darussalam (Score 65.14), 47. Oman (Score 65.10), 48. Kazakhstan (Score 64.76), 49. Jordan (Score 64.59) aser 50. Nicaragua (Score 64.53) linüktem lir.

ANO GO ABEN TSÜNGREM DEN

Telangzüba Kaket T.Ken 119:129-136

Nai mangatetba ammag aser anüing akongba ajangshia arua lir asü? Anogo karbo kanga jangramatem süidaktsür. Ken ken asenoki ammag ajanga süir aser Tsüngremer lima nung kechi ataloker ta süngmanger. Mesüra asenoki yasa tzüraba ajurur- tanelaren asenok takong, ayar aser tzürar.

Mangateti alir dang telangzüba kechi agütsür? Tsüngrem O. "Ne temelaba ozüingtem tesüngmangtsü lir, aji asü nung ni itemji benshitsü" (t.129). Kodang asenoki Laishibaji züngdir aser tashi angadir takümji memetetba taküm ka masütsü. Iba yagi atamata takümji tesüngmangtsü taküm kümdaktsür. Kodang asenok tekolok aser temulungjang Laishiba agi sünga lidir, asenoki anguba ajak balaka asütsü.

Ammang nung telangzüba kechi? "Ne o tem lapokba agi tesangwa agütsür, iba yagi tongmelang purtem nem tangatetba agütsür" (t.130). Lapokba tetezü aitdaktsüba, Tsüngremer O lapokba. Tsüngremi asenok dang rasa ashidang asenok sangwadaktsür aser peladaktsür. Tanü nai ammag ajurura, ne Laishiba züngang aser iba jagi ne nem tesangwa agütsütsü. Tzüraa alirtem dang telangzüba kechi? Ken ken asenoki kecha maka ama bilemer aser nüngdak adoker. "Ni tangu sadema tebang kaar ali, kechiyong ni ne temelabatem yongyaa ataa ali" (t.131). Tsüngrem O ji mopung temerük ama lir. Kodang asenok tzüradir tzüratemdaktsür aser asenok ayadang ibai chiyongtsü ama lir.

Nai takong, ammag, mesüra mangatetba kodang ajurudir Tsüngrem O dangi meyipang. Iba ochi jagi ne tanela sangwatsütsü aser iba tenangzükbateri na tasü itdaktsütsü. Ne nüngdak peridaktsütsü asoshi Tsüngremi Laishibaji asameyang. Anungji kodang tasü maittsü anogotem arudir, ne kolok aser ne temulungjang o jagi mesüang.

Brazil nung Arogo kati pastor aser kinüngtsü na atema mangyimer



Pastor, Felisberto Sampaio (abelen) aser Inalda Sampaio

anepdang 10:00 ako meta iba lendong ya atalok. Pastor aser kinüngtsü napronglaji tzü telung nungi a g i t e t a k ü m z ü k t s ü merang saka t e n a p r o n g süadoker liasü.

P a s t o r S a m p a i o ' e r kibong ya Brazil nung Campina Grande yimti

January 19, 2023: Brazil nung aliba Arogo ka nung pastor aser pa kinüngtsü nati par jabaso tainlonglong ka tzü nung araksetba mapang kümzüksü merandang tenaprongla süogo.

January 10, 2023 nü Brazil nung aliba Camacari tzüküm nung arrshi küm 43 pastor, Felisberto Sampaio aser pa kinüngtsü, Inalda Sampaio (42) nati par jabaso arrshi küm 13, Ian Sampaio tzü nung teimtemba ngua tenati pa kümzüksü atema tzü nungji pongoka liasü saka tenati par jabaso mekümzüktetba dang masü saka tenaprong tzü nungji arakseta asü.

Ajisüaka angopurtemi par jabasobo kümzütetata liasü. January 10, 2023 nü

nungi lir aser pa Quixaba, Paraíba nung aliba Assembly of God Arogo nung küm 12 pastor inyaka aruogo.

Iba tatalokba sülen Arogo züngsemtemi pastor aser kinüngtsü na asüba atema mangyimdar.

Tanga Arogo ka nung pastor, Leonardo Meneses-i, "Iba tatalokba ya tejashitsüka lir aser asenoki angatettsü tasak. Taküm nung tatalokbatem aika atema kuli ya kodakeri dang rasaa ashitsü akok," ta ashi.

January 11, 2023 nü osangbener den jembidang Pastor Sampaio'er jabaso tambusang, Issac Sampaio-i, "Ni ozü tsüraburtem ajurutsü tebilemba liasü. Ni tesüsa ozü tsürabur ajurubaji January 8 nü liasü," ta ashi.

**AO OSHI ANGAZÜKDAK:
TANÜ ANGAZÜKTSÜBA OJANG**



Opokapa

(v) miim o rakpoka ashi (disclosing of secrecy)

* Samsoni tetsürla dang **opokapaba** agi pa lendongi ai.

Obhong

(n) o tepung küma renem (white paper)

* Yimten ken o ajak **obhong** kümer metetdaksütsüla.

OLONG PAITEP # 6404

15x15 crossword grid with numbers 1-16 indicating starting positions.

TIPIEN

- 2. Auo nung chiyongtsü asenba - (7)
- 5. Mangyimba mapang - (5)
- 7. O tamendakdak - (4)
- 8. Pei dak malangba - (7)
- 10. Juli - (7)
- 12. Sen ayudak - (7)
- 14. Tenük agi ajitet - (4)
- 15. Tamajung aküm - (5)
- 16. Apuso - (7)

LANGTSÜNGLEN

- 1. Lenmang - (7)
- 2. Aor kidong ka tenüng - (6)
- 3. Tenarong maten - (6)
- 4. A _ _ _ g - (3)
- 6. Mopung apodoka - (3)
- 9. Tongtipang tagitsü - (7)
- 10. Menungra bilem - (6)
- 11. Aiür - (6)
- 13. S _ _ _ k - (3)
- 14. T _ _ _ r - (3)

OLONG PAITEP # 6403 TELANGZÜBA

TIPIEN :

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

LANGTSÜNGLEN :

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar, 11. Tatok,
- 12. Amang, 14. Jala.



ALOKBAR SCHOOL NUNG :



Teacher : Tatishi agi nai nü long pant pocket külen sen 50 aser tanga pocket nungji sen 100 liasü, süra nü ket nung kechi lir? Alokbai shiangjung.

Alokba : Obala indang long pant aibelena asema lir.

Teacher : Oh Alokba!!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Tripura nung TIPRA züngsem ka tepsetba atema 4 apu

Agartala, January 19, 2023

(Agencies): Tripura nung TIPRA party züngsem ka tepsetba atema police-i nisung pezü puogo.

Iba lendong ya Kamalpur sub-division kübok Bamancherra nung atalok.

TIPRA party züngsem arishi küm 44 tain Pranajit Namasudra ji par kidangi aodang len tom nung tepset.

Nisung kari Bamancherra tesem nung Pranait indang gari anendaksü aser pa gari nungi

anizüker kanga mejungi yirutsü, ta Tripura police-i metetdaksü.

"Iba lendong atalokba sülen police telok ka tesem tonga ao aser pa Kamalpur hospital-i anir ao. Idakji pa anepaluba sülen Kulal hospital-i anir yok saka pa asü" ta Tripura police-i ashi.

Taoba mapang nungi tsükchitepa aruba ajanga iba ya atalok, ta police-isa ashi.

"Surma constituency II nung BJP züngsemtemi Tipra motha züngsem Pranajit

Namasudhra kanga mejungi yirutsüba osang angashir. Ni ozü züngsemtem dang timi dang alitsü aser tensa meraksatsü mepishir" ta Tripura chuba jabaso aser TIPRA chairman Pradyot Debbarma-i ashi.

"Ni iba tatalokba atema osang agitepdar anungji party züngsemtem dang kecha meinyaktsü ayongzüker. Election agitsü mapang tonga arudang ozüng alema inyaksangshiba maginür" ta Pradyot Debbarma-isa ashi.

Meghalaya BJP-i menden 10 nungi 15 tashi nung dang takok angutsü

Shillong, January 19, 2023

(Agencies): Meghalaya nung Bharatiya Janata Party (BJP)-i state election nung menden 60 prong nung tokteptsü akok.

Ajisiaka, Meghalaya state BJP president Mawrie-i menden 10-15 nung dang takok angutsü akok ta shiogo.

"Onoki menden 10 nungi 15 tashi tenük yoka lir aser item menden nung takok angutsü akok" ta Mawrie-i ashi.

BJP-i in-house survey agiba ama menden teimba nung takok

angutsü imlar. BJP-i assembly menden 10 nungi 15 dak tali mengutettsü ta paisa ashi.

Külen, Election Commission-i Meghalaya Assembly election anogo metetdaksüba ya BJP dak alaka political party teimba ka pelashishia agizükogo.

Election agitsü osang sangdongba aser polling anogo tsüngda mapang talangka aliba ajanga tongti teloktemi voter tem mesüzüktsü maongka angutsü, ta Meghalaya BJP-i ashi.

EC-i February 27 nü

Meghalaya nung election agitsü aser March 2, 2023 nü votes azüngtsü osang metetdaksüogo.

BJP-i menden 60 prong nung tokteptsü renema lir aser tang tashi nung menden 40 tema nungi tickets meshir, ta state president Mawrie-isa metetdaksü.

BJP ya NPP-i aniba Meghalaya Democratic Alliance nung dena lir saka parnoki taruba election atema political party kecha dena tesentaktep yanglua mali.

Manipur hill district 4 nung nung 'Super-speciality health facilities' agütsütsü

Imphal, January 19, 2023

(Agencies): Manipur sorkari hill district pezü- Senapati, Ukhrul, Tamenglong aser Chandel nung super-speciality healthcare facilities aser infrastructure yanglutsü telemtetba agiogo.

Iba ajanga meta talang pilar yimtsüng nung alirtemi Imphal-i temang anepalui maotsü, ta Chief Minister N Biren Singh-i ashi.

Ukhrul district kübok Jessami yimtsüng nung Tekru-Nge benjung nung tongti tesemdanger ka ama shilem agidang CM Biren-i iba osang metetdaksü.

"Hill district tem nung specialists doctors meliaka Tele-ICU ajanga specialist doctors-i anepalur. Onoki specialist doctors teimba akümtsü meranger" ta pai ashi.

"Makhel nung Heritage Park ka yangluogo aser kin

balala tsüngda adianu tesentaktep ayuba ajanga state nung nübertem longjemer. Nisung ajaki putiotsü meyanglushitsüla kechiyong tanü putiotsü lepa aruogo aser nübertem ano longjemogo" ta Manipur CM-isa metetdaksü.

Manipur sorkari 'Go To Hills' aser 'Go To Village' scheme tem tenzükkba ya meta talang pilar aliba yimtsüngtem nung nüngdaktem metettsü atema lir. Item scheme tenzükkba ajanga sorkari lenmang, schools, offices aser health facilities maliba metetogo, ta paisa ashi.

Taoba kümsük nung sorkari nübertem atema mapa aika meinyaktet kechiyong COVID wara ajanga küm ana ser tesadang ka asenok timtema liasü ta CM Biren Singh-isa ashi.

"Prime Minister lenisüba kübok Minority and Other Backward Classes Department

ajanga hill district tem nung Rs 1200 crore shi endokogo. Hill district tem nung Model Residential School, LM Block, Ukhrul District aser Women's Market lapokogo. Ano tesem tenet nung Model Residential Schools yangludar aser Sadbhavna Mandaps, Women's Markets, Oxygen Plants, transit accommodations mapa inyakdar" ta Biren-isa metetdaksü.

Iba benjung nung shilem ka ama CM Biren-i Model Residential School, LM Block, Ukhrul aser Cave Tourism Project, Khangkhui Cave lapoktsü.

Iba sentong nung Minister Khashim Vashum, Minister H Dingo Singh aser MLA Thangjam Arun Kumar nungger aden.

Jessami ya Manipur anüdoklentip tsütsü lir aser iba yimtsüng ya Nagaland kübok Phek district den arrtsütepa lir.



Mizoram kübok Champhai district nung Myanmar nungger refugee tem indang tesepe angur. Parnok ya tawa Myanmar mitkartemi tayimtsü amshia telungpur teseptem amakdang jena aruba liasü. Mitkartemi Chin National Army (CNA) indang headquarters amakba sülen parnok Myanmar nungger 251 arua lir ta Champhai Deputy Commissioner James Lalrinchhana-i metetdaksü.



Male, January 19: Velana International Airport, Male, Maldives nung China Capital Airlines' flight JD455 water cannon salute agüja agizükba noksa nung angur. China-i tawa COVID-19 achaayangba dak sendakba nung tasa melenshiba sülen tang mezüngbuba China nungi indang indang Maldives-i tayimtsü ao tenzükogo. Capital Airlines' flight nung alima penzü 190 mener Bodhbarnü Chinese Ambassador Wang Lixin, Maldives Tourism Minister Abdulla Mausoom aser tanga ketdangsürtemi agizüka liasü.

Ukraine-i parnok nem takaratiba nung hadirtem agütsütsü mepeshi

Kyiv, Aenjeti/January 19 (Agencies): Ukraine-i anüolen aliba linüktem dang parnok nem takaratiba nung tank aser air defence hadirtem agütsütsü mepeshia metetdaksüogo aser ashiba agi, linüktem nung sensaksem kanga meyilongi aoba ajanga Ukraine nunger taküm aika samadar.

"Onok asoshi mapang mali, alima asoshia iba mapang ya mali," ta Ukrainian presidential administration tekolakba Andriy Yermak-i Telegram messaging app nung zülutsü.

Anüolen aliba linüktem Hokolbarnü Ramstein Air Base Germany nung ajuruteptsü, kong Berlin-i Leopard 2 battle tanks tem Kyiv nem agütsütsü asoshi temelaba agütsütsü magütsütsü iba indang sensak asemtsü.

"Ukraine nem tank agütsütsü asoshi jembishinüba ken o ya takokba tashi takaratiba nung tembangtsüla. Kasaji air defence system talila atema-a takaratiba nung sensak asemtsü nüngdaker," ta Yermak-i ashi.

"Sensaksem menoba ajanga Ukraine nungertem taküm aika samadar. Inyakyim ya yamai masütsüla," ta paisa ashi.

Tir Volodymyr Zelenskiy-i Bodhbarnü World Economic Forum nung o jembiba mapang kasa temepeshiba ya agüja liasü. Zelenskiy-i, Russia-i par linük tanaben mamak tsüngda tank aser air defence unit tem takaratiba nung agütsütsü nüngdaker ta ashi.

Iba hopta Britain-i Germany nongshi, anüolen aliba linüktem rongnungi Kyiv nem tank

agütsüba mezüngbuba linük kümogo.

Russia-i Ukraine amak tenzüker ita 11 shi aoer aser Moscow-i Ukraine anütok aser anüolentip len tesem aika atsünger lir. Ita aika Kyiv-i rara aziüoka aruogo, saka anütoklen tejakdangi aotsü atema Moscow-i jenjang aika agiogo.

Leopard tank tem ya NATO linüktem aika ket nung lir, ajüsüaka item tank tem Ukraine nem agütsütsü asoshi Germany-i temelaba agütsütsü nüngdaker.

Ukrainian Defence Minister Oleksii Reznikov-i, Greece, Denmark, Spain, Canada, the Netherlands, Germany, Norway, Poland, Portugal, Turkey, Finland aser Sweden dang parnok nem Leopard 2 tank tem agütsütsü asoshi mepeshia asüngdangogo.

PTI aser military lenirtem tsüngda tesendaktep mali: Imran Khan



Islamabad, Aenjeti/January 19 (Agencies): Pakistan Tehreek-e-Insaf (PTI) mendenbuba Imran Khan-i Bodhbarnü ashiba agi, par party aser military lenir tasentem tsüngda kecha tesendaktep mali, ta Pakistan nung amendaker aliba News International newspaper sangdong ka ajanga metetdaksü.

Khan-isa, pa Pakistan army chief, General Syed Asim Munir den kecha tesendaktep mali ta ashiba den, linük nung general election 2023 küm April ita agütsü ta ashi.

Pai, Pakistan nung tang sorkar künfteter aliba party tem nem teyari agütsüba atema taoba army chief Gen (ret'd)

Qamar Javed Bajwa dak tai tongloktsüogo aser ashiba agi, tang joko April ita general election ayongzükba agütsü atema sorkar nongshitsü.

"Parnoki sorkar künfteter mapang sen billion 1,100 alanga parnoki indang ochi mashi ken o agütsütsü," ta pai ashiba The News International sangdong ajangsa metetdaksü.

Khan-isa, linük rongsenketzüng jenjang kanga mejungü akümba ya sorkar dak tai tongloktsüogo aser ashiba agi, Pakistan indang rongsenketzüng iba amai kodanga maliasü. Paisa, iba ken o bentettsü atema tebandang kecha makai merek mereka election agiba ajanga dang bentettsü, ta ashi.

"Ato Kilonser Shehbaz Sharif-i aniba sorkar ya ochi mashi inyakyim ajanga tashi dangi aru," ta Khan-i ashi.

PTI tekolakbai ashiba agi, sorkar kübok yimsüsürtemi parnok ozüng tema nung toktsür aser küm aika tejakdang parnok anema ochi mashi ken o benoker alibatem agütsütsü. Shehbaz Sharif, Nawaz Sharif, Asif Zardari aser Maryam Nawaz nunger anema ken o benoker alibatem ajak taitokogo," ta pai ashiba The News International sangdong ajanga metetdaksü.

Khan-i ashiba agi, tebandang mekai election merek mereka agütsü atema PTI-i Khyber Pakhtunkhwa aser Punjab assembly bendanga agütsütsü. "Tang sorkari April ita election ayongzükba agütsüsa dang akümtsü," ta pai ashi.

Pai, investor mesüra shishilembartem aser bendanger investor temi sorkar dak tamang makar, ta ashi.

"Pakistan jenjang kanga mejungü kümogo, Sri Lanka ama tensa kati linük midaktsütsü atema ochishia tetsükdaksü kecha makai election agütsü nüngdaker," ta Khan-i ashi.

MULUNGNEN O



Tsürabur Mr Taliwaba
21.06.1944 - 12.01.2023

Asür M Taliwaba kinunger aser adianutemi onok asükho mapang nung nenok teyari aser aria bilem temiem tulu asoshi pelaba metetdaksür.

Yimtsür yimertem, kiyongertem, adianutem aser temiemertem nenok sarasadem den tajungtiba agi yariba asoshi kanga pelar. Talisa Kohima Asangma Senso Telongjem, Kohima Asangma Fellowship, Kohima AsangmaTetsür Telongjem aser lokti balala shirnokisa aonung nüken belema aser tasümgang tasoli tonga yariogo nenok ajak dang pelar.

Ano kishikinar, anükako aser temiemertem shirnokisa tsüngdong arua nübo aser rongsen agi yariogo nenok ajak dang pelaba metetdaksür.

Nenok mapa tajung onok mulungjang nung teti mamai alitsü. Tsüngremi nenok ajak moajang.

Menungra Bilemteter



Asür. P. S. Alemba

Nai onok iba lima nungi toktsür külen tanü agi küm ana ajunger, aji saka na onok molungjang nung tanü tashi mepilai lir. Mapa aser mapang ajak nung külemi inyaka aser khuret ajak lemsatepa aruba to kangasa menungrar-a nih.

Tsüngremi na teti tesünep nung yujang ta sarasademtsür.

Teti meimtepa aliba Kinungtsü, Chirnur aser Kinungertem.

MULUNGNEN PELA O



ASO:
1936

ASÜ:
11.01.2023

Asür **Nungdokinla** (Longmisa) tasüba anogo tashi teyariteper ajak dang kangasa pelar. Tsüngremi Noklangbena lepa moajangma.

Kinungertem

Office of the
KANGTSUNG SENSO TELONGJEM TULI
Tuli, Nagaland

TENÜNGSANG AGÜTSÜR

Shri. S Imdong Ao, Government tenzükba wadang nung temaba jenjang (Accountant ADC Office Mangkolemba) ngutetba asoshi KSTT ajanga tenüngsang aser konang tetushi tulu agütsür.

Maneni Tsüngremi nü wadang nung ano tali moajangma ta asen sensosanger-i sarasademtsür.

Sd/-
Temsuinba.
President, KSTT.

Sd/-
Masakumzuk
G/Secretary, KSTT

TENÜNGSANG AGÜTSÜR

Lt. Angutemsü aser Mrs. Satemzüngla (Mongsenyimti) na jabaso **Dr. Lipoktoshi-i** Department of Commerce nung Doctor of Philosophy (Ph.D) in commerce on the Topic **"Rural Entrepreneurship in Nagaland: Problems and Prospects."** under the supervision of Dr. Amrendra Kumar, Department of Commerce, Nagaland University, Kohima Campus Meriema nungi ngutetba asoshi kinunger ajaki pela-a Tsüngrem tenüng asanger aser takok tulu asoshi Pa nem tetushi agütsür.

Tarutsü nunga Tsüngremi taküm tajung aser temoatsü pa nem moajangma.

~ Brother, Sisters, In-laws, Nieces & Nephews

'Asaya aser tetsür asayartem tarutsü atema longkak aiter': Bajrang



Jantar Mantar nung Wrestling Federation of India (WFI) anema longkak aitba mapang wrestlers Vinesh Phogat, Sakshi Malik aser Bajrang Punia nungertem-i shilem agiba noksa.

New Delhi, Aenjeti/January 19 (Agencies): "Iba longkak aitba sentong ya asaya aser tetsür wrestler tem tarutsü kümzüka ayutsü atema agir. Iba ya politics dak kecha sendaka mali" ta Bajrang Punia-i Brehostibarnü ashiba den iba longkak aiba sentong nung politician tem dang shilem agitsü asoshi masüngdangtsü aser parnok nem o jembitsü atema dena temelaba magütsütsü, ta nenshia metetdaksü.

Chhatrasal trainee aser Tokyo Olympics silver medalist wrestler Ravi Dahiya densema wrestler noklang aikati Jantar Mantar nung Wrestling Federation of India anema Brehostibarnü longkak aita liasü. Tokyo Olympic silver medalist aser junior World medalist Deepak Punia aser Anshu Malik natia iba sentong nung shilem agi. BJP MP aser Wrestling Federation of India (WFI) tir Brij Bhushan Sharan Singh-i parnok mebenshitsu yimya benshiba atema Vinesh Phogat aser Sakshi Malik nati pa aitsüba sülen anogo ka lir iba longkak aitba sentong ayongzüka agia liasü.

2014 Commonwealth Games gold medalist aser BJP lenir Babita Phogat-i Brehostibarnü Jantar Mantar nung Wrestling Federation of

India tir Brij Bhushan Sharan Singh anema longkak aita aliba wrestler tem dang iba ken o ya bentetsütsü ta shiogo. "Sorkar parnok den dena lir. Parnok ken o tanüsa bentetsütsü asoshi ni merangdangtsü," ta wrestler tem den sensaksem asema sülen osangbenertem den sensaksemba mapang Phogat-i ashi.

Bodhbarnü Phogat-i ashiba agi, "pai tetsürtem indang camp teti Lucknow nung ayongzüka agir, kong par ki ka lir. Pa anema nokdaksü atema item tanurtem ajak tasüita aruba atema kanga pelar."

"Wrestling Federation of India (WFI) ochi mashi inyakyim anema nokdaksü atema onok wrestler tem ajak idaki adenshia lir. Onok longjemer lir aser ochi obendang mangu tashi onok longjemer maneni longkak aittsü," ta Dahiya-i ashi.

2022 Commonwealth Games aser 2021 World Championships silver medalist Anshu Malik-i ashiba agi, "team hotel nung tetsür wrestler tem anenba takdang opposite nung Wrestling Federation of India tir Brij Bhushan Sharan anenba ajanga tetsürtem minpronger. Tetsürtem asayaba sülen parnok takdangi meyipa

maoer."

Ajisüaka Singh-i item taitsubatem ya magizük aser ashiba agi, pa aitsüba ya shidak ta ngutetra pa aletseta südakjang. "WFI-i tetsür ka dak mebenshitsu yimya benshi ta kari danga ashir asü? Vinesh kijai ashi. Kari dang jurila arur parnok dak shidak mebenshiba indang ashi asü? wrestler katidanga la dak mebenshitsu yimya benshi ta shira iba anogo ni aletsetang," ta pai ashi.

Aluyimer lenir Narendra Tau-ia Brehostibarnü iba longkak aitba sentong nung shilem agi aser ashiba agi, "ni tetsürtem pusemstü atema idaki aru, saka WFI tir mapa nungi maginra iba longkak aiba sentong ya revolution ka akümtsü. India jalatem ola mangara kechi ataloktsü aji lenirtemi meteta lir."

Singh anema tashishiba benokba dak sendakba nung sports ministry-i WFI dang telangzüba ka agütsütsü metetdaksüogoo aser ken o dak sendakba nung taruba ghonda 72 tsüngda telangzüba agütsütsü tetuyuba agütsüogoo.

Ministry-i ashiba agi, "WFI-i ghonda 72 tsüngda telangzüba magütsüra National Sports Development Code, 2011 dak ajemdaker ministry-i federation anema jenjang tapet agitsü."

Nadal hopta 6 nungi 8 tashi masayatetsü

Melbourne, Aenjeti/January 19 (Agencies): Australian Open tanabuba round asaya nung hip flexor yiruba sülen Rafa Nadal hopta trok nungi ti tsüngda asaya nung shilem magitettsü, ta par team-i Brehostibarnü metetdaksü.

Bodhbarnü tanabuba round asayaba mapang pa 6-4 6-4 7-5 agi Mackenzie McDonald-i koka liasü.

Arishi küm 36 tain asayar ya Brehostibarnü Melbourne nung pa tetsüng tabelenlen MRI scan agi aser iba sülen Illiopsas,

primary hip flexor yirur aliba nguteta liasü.

"Pa Spain tonga aoba sülen anogo ishika anisüngzüksü aser a n t i - i n f l a m m a t o r y physiotherapy tenzüksü," ta par team-i ashi.

"Pa ita trok nungi ti tsüngda taneptsü angutsü."

Grand Slam 22 tashi koker aliba asayar ya taoba küm Wimbledon sülen tesaret, tepok aser tetsüng yiruba ajanga pa mapang talangka masayatet aser taoba küm U.S. Open sülen taküm Melbourne nung

masaya tsüngda pai asaya ka dang koker liasü.

"Kanga mejungibosa yirur malitsü ta imlar. Hopta asem tashi kanga junga practice bo agiogo," ta pai asaya makokba sülen osangbenertem dang ashi.

"Yiruba ajanga ni mapang talangka masayatetsüsabo masütsü imlar, kechiyong tanaben recover asütsü tasak asütsü. Yirur aliba taneptsü anguba dang masü saka temaba jenjang nung asayatsüsa asayashitsüji temela masü," ta pai ashi.

Mokokchung nung mezüng buba Futsal asayadak tanü lapoker

Mokokchung, Aenjeti/January 19 (TYO): Mokokchung nung mezüngbuba Futsal asayadak January 20 anepdang lapoktsü. Iba asayaba tesem ya Salangtem Ward Mokokchung nung lir. Mokokchung asoshi

mezüngbuba dang masü saka iba ya FIFA approved Futsal Turf lir. Lapokba anogo nungi tenzüka futsal asaya meimer aser asayanertemi iba tesem nung aruagi asayatsü teti lapoka alitsü ta achaayanger ajanga sangdong ka nung metetdaksü.

Army-i yimtsü trok nem asaya dang amshiba osettem agütsü


Dimapur, Aenjeti/January 19 (TYO): Indian Army-i, January 18 nü Kohima District kübok kinük nung aliba yimtsüng trok nem asaya dang amshiba osettsüt balala agütsüogoo.

Yimtsüngtem rongnung Kigwema, Shakabama, Kezo town, KezoBasa, Kezoma aser Kezocha densema lir. Yimtsüng nung aliba lanurtemi mepeshiba sülen Red Shield Division, Operation Sadbhavna kübok iba project ya benoka inyakogo.

Chakabama Military Garrison nung sentong ka ayongzüka agiba mapang yimtsüng balala nungi Village Council Chairmen aser students' union tem nungi züngsemtemi shilem agia liasü.

Lanurtem ajungkettsü aser saisapong ajungketba den külemi lanurtem libaliro tajungba küma lidaktsütsü asoshi India Army bendanga agütsür lir, ta PRO (Defence) sangdong ka ajanga metetdaksü.

Odisha FC-i Aniket Jadhav alizükogoo



Aniket Jadhav

Bhubaneswar, Aenjeti/January 19 (Agencies): Indian Super League (ISL) club Odisha FC-i East Bengal FC nungi Aniket Jadhav alizükogoo. Pa den 2024 küm tashi club nungi asayatsü atema tenangzüktepba ka yangluogo.

Aniket Jadhav ya Kolhapur, Maharashtra nung aso. Jadhav ya Elite Academy batch nung shilem ka liasü, koba 2017 FIFA U-17 World Cup atema renemshiba batch ka liasü aser pai U-17 World Cup nung India tenüng nungi asayaogoo.

2017 küm Jadhav ya Indian Arrows nungi asayatsü atema shim. Pa iba club nungi professional asaya mezüngbuba Chennai City FC den asayaba mapang asaya. Iba asaya Arrows puri goal 3-0 agi akok aser pai goal ana idakja liasü. Maneni pa 2019 küm Blackburn Rovers academy nung ita asem training agia liasü.

ISL nung pa 2018-19 season nung Jamshedpur FC nungi mezüngbuba asaya. Red Miners nungi asaya 27 nung

shilem agiba mapang pai goal ana idaktsü. Jamshedpur FC nungi küm asayaba sülen pa 2021-22 season nung Hyderabad FC-i ao aser parnoki ISL trophy mezüngbuba akokba nung teyari agüja liasü. Iba küm pai asaya 20 nung goal ana idaktsü aser assist asem süja liasü.

2022 küm March ita Bahrain aser Belarus den friendly masaya tsüngda Jadhav ya coach Igor Štimac-i India team nungi asayatsü atema jaok aser pa India team nungi anaben asayaogoo.

East Bengal FC nungi asayaba mapang pa minute 186 dang asaya aser tang Odisha FC pur mezüngbuba ISL playoffs-i aitsü asoshi meranga asayaba mapang pa asaya timba nung shilem agitsü imla alitsü.

Arishi küm 22 tain asayar yagi Odisha FC den tenangzüktepba ka yangluba atema kanga pelaba lemsatepogoo.

"Iba season nung taruba asayatem nung OFC indang jersey asemstü ya tetushi aser maangka tulu ka lir. Kü dak tamang akaba atema aser iba club aser Odisha nungertem tenüng nungi asayatsü atema maoangka agütsüba atema kanga pelar," ta pai ashi.

Odisha FC pur ISL point table nung tang jenjang pongububa nung lir. Parnoki taoba asaya pongu nung asaya ka dang koka lir.

BILEMDANGANG

"Temeim maliba taküm kaji süngjang mesüra teben maliba süngdong ka ama lir."